



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 039457 21 Iž  
Sarajevo, 12.01.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, predsjednik vijeća, dr Branka Moraita i Zvezdane Antonović, članovi vijeća, odlučujući o žalbi političkog subjekta HDZ BiH-Hrvatska demokratska zajednica BiH, sa sjedištem u Mostaru ulica Kneza Domagoja bb, kojeg zastupa predsjednik Dr. Dragan Čović, izjavljenoj protiv odluke Centralne izborne komisije Bosne i Hercegovine broj: 05-1-07-1-1/21 od 03.01.2021. godine, u nejavnoj sjednici, održanoj dana 12.01.2021.godine, donio je

**R J E Š E N J E**

**Žalba se odbija kao neosnovana.**

**O b r a z l o ž e n j e**

Odlukom Centralne izborne komisije Bosne i Hercegovine, broj: 05-1-07-1-1/21 od 3.1.2021. godine, utvrđeni su i objavljeni rezultati Lokalnih izbora 2020. godine u Gradu Mostaru.

Protiv navedene odluke žalitelj je blagovremeno izjavio žalbu navodeći da je ožalbeni rezultat više povreda Izbornog zakona BiH i to: čl. 2.9. st. 1. toč. 9), 3, 12 st. 1 i 2. , koje su bitno uticale na konačni izborni rezultat, odnosno raspodjelu vjećničkih mandata i na pogrešni utvrđeno činjenično stanje. U žalbi je posebno istaknuto da su organizirana skupina birača bošnjačke nacionalnosti sudionici protupravnog organizovanog preseljenja iz jedne izborne jedinice u drugu izbornu jedinicu s nedvosmislenom namjerom uticaja na izborni rezultat u izbornom području Jug, izbornu jedinicu 4 (Jug)-151, a što je predmet istrage po podnesenoj krivičnoj prijavi. Posebno ističu da je to fiktivno prijavljivanje koje izaziva promjene strukture birača bilo naročito izraženo u naseljima Gubavica, Jasenica, Pijesci i Buna. Ističe se u žalbi da CIK BiH nije mogla donijeti ožalbeni odluku, jer postupak po krivičnoj prijavi koja treba da razotkrije markirane izborne prevare nije završen. Navode i da je CIK BiH nadležna da pazi na vjerodostojnost i tačnost Centralnog biračkog spiska kako je to propisano članom 3.6 stav 1) Izbornog zakona BiH, te je dužna o tome larmirati nadležne organe, te predlaže Apelacionom vijeću Suda BiH da naloži CIK BiH ponovno raspisivanje izbora za sporna područja posebno Izbornu jedinicu 4 Jug.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Žalba nije osnovana.

Prema shvatanju ovog apelacionog vijeća, pobijana odluka o utvrđivanju i objavljivanju rezultata Lokalnih izbora 2020. godine u Gradu Mostaru broj 05-1-07-1-1/21 od 3.1.2021. godine kojom su utvrđeni i objavljeni rezultati za izbor vjećnika u Gradsko vijeće Grada Mostara donijeta je u skladu sa odredbama člana 19.4 Izbornog zakona BiH.

Odredba člana 3.3 Izbornog zakona BiH (Sl. glasnik BiH broj 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 39/08, 32/10, 18/13, 7/14, 31/16 i 41/20) propisuje da se Centralni birački spisak sačinjava i vodi na osnovu podataka iz službenih evidencija o prebivalištu i boravištu državljana BiH koje vode nadležni državni organ, drugih javnih isprava i službenih evidencija o državljanima BiH koje vode CIK BiH i drugi nadležni organi i na osnovu javnih isprava i podataka koje dobiju neposredno od građana.

Odredbom člana 3.5 stav (2) Izbornog zakona Bosne i Hercegovine je propisano da Centralna izborna komisija BiH vodi Centralni birački spisak za teritoriju Bosne i Hercegovine na osnovu evidencije nadležnog državnog organa koji vodi registar građana Bosne i Hercegovine u skladu sa Zakonom o centralnoj evidenciji i razmjeni podataka, osim ako ovim Zakonom nije drugačije određeno.

Nadležna ministarstva unutrašnjih poslova u Bosni Hercegovine su organi koji vode evidencije o državljanima BiH u skladu s odredbama Zakona o jedinstvenom matičnom broju, Zakona o prebivalištu i boravištu državljana BiH i Zakona o ličnoj karti državljana BiH, što znači da vode i evidenciju o promjenama prebivališta i boravišta, koje na osnovu člana 3.5 stav (5) Izbornog zakona BiH su dužni da sve promjene koje utiču na ažurnost Centralnog biračkog spiska dostave Agenciji za identifikacione dokumente, evidenciju i razmjenu podataka Bosne i Hercegovine (IDDEEA), organu koji tehnički održava evidenciju Centralnog biračkog spiska.

Shodno navedenom izvodi iz Centralnog biračkog spiska za glasanje na izborima se sačinjavaju, pored drugih zakonom propisanih uslova, na osnovu evidencija prebivališta državljana Bosne i Hercegovine koje vode nadležna ministarstva unutrašnjih poslova u Bosni i Hercegovine, koja su odgovorna za ažurnost i ispravnost navedene evidencije.

U konkretnom slučaju izvodi iz Centralnog biračkog spiska za glasanje na Lokalnim izborima 2020. godine su sačinjeni na osnovu evidencija prebivališta državljana Bosne i Hercegovine koje vodi Ministarstvo unutrašnjih poslova Hercegovačko-neretvanskog kantona.

Nema osnova žalbeni navod da je Centralna izborna komisija BiH po saznanju da su zloupotrebe prebivališta učinjene od nadležnih tijela koja vode službene evidencije o jedinstvenom matičnom broju, prebivalištu i boravištu državljana BiH, trebala zatraži pristup i uvid u dokumente vezano za prijave i prebivalište. Naime, odredbama Izbornog zakona BiH nije propisana nadležnost CIK BiH da preispituje rad ministarstava unutrašnjih poslova u Bosni i Hercegovini, kao i način vođenja prijave prebivališta i promjena istih građana BiH. Ovu činjenicu potvrđuje i sama krivična prijava Hrvatskog

narodnog sabora BiH broj: 1-22/20 od 19.12.2020.godine podnesena Kantonalnom tužilaštvu Hercegovačko-neretvanskog kantona Mostar, koji je jedini nadležni organ da izvrši provjere po sumnjama podnosioca žalbe, u konkretnom slučaju, na nezakonit rad ministarstva unutrašnjih poslova Hercegovačko-neretvanskog kantona, kao i da su se pojedini birači (većinom bošnjačke nacionalnosti) prijavili fiktivno na nove adrese stanovanja.

Imajući saznanje da je već podnesena krivična prijava, kako je navedeno u prigovoru podnosioca žalbe, Centralna izborna komisija Bosne i Hercegovine je pravilno donijela zaključak kojim odacuje žaliteljev prigovor zbog nenadležnosti, a što je potvrdilo vijeće Apelacionog odjeljenja Suda BiH svojim rješenjem broj: S1 3 IŽ 039440 21 IŽ od 8.1.2021. godine, odbivši kao neosnovanu žalbu žaliteljice izjavljenu protiv zaključka CiK BiH broj : 05-1-07-5-2156-3/20 od 30.12.2020. godine..

Ovo vijeće posebno ističe da su privremeni izvodi sačinjeni sa danom raspisivanja Lokalnih izbora 2020 godine u Gradu Mostaru prema podacima iz Centralnog biračkog spiska za birače koji glasaju u Mostaru, koji su dostavljeni putem e-maila Gradskoj izornoj komisiji Mostar da ih izlože u skladu sa svojim planom izlaganja privremenih biračkih spiskova.

Nadalje, nakon usvajanja Zakona o izmjenama i dopunama Izbornog zakona Bosne i Hercegovine („Službeni glasnik BiH“, broj 41/20), u skladu sa odredbama Izbornog zakona Bosne i Hercegovine i podzakonskim aktima, posebno Pravilnikom o upotrebi i izradi izvoda iz Centralnog biračkog spiska („Službeni glasnik BiH“, br. 25/20 i 38/20) u propisanom roku, a po donošenju Odluke Centralne izborne komisije Bosne i Hercegovine o zaključivanju i potvrđivanju Centralnog biračkog spiska za Lokalne izbore 2020.godine u Gradu Mostaru i objavljivanju broja birača za gradsku izbornu jedinicu i izborne jedinice gradskog područja („Nadalje, nakon usvojenog Zakona o izmjenama i dopunama Izbornog zakona Službeni glasnik BiH“, broj 73/20), su i sačinjeni konačni izvodi iz Centralnog biračkog spiska za redovne birače prema specifičnostima organizacije izbornog procesa u Gradu Mostaru.

Iz stanja spisa proizlazi da je u cilju određivanja biračkih mjesta sa pridruženim pripadajućim ulicama prema izbornim jedinicama gradskih područja u Gradu Mostaru utvrđenim navedenim Zakonom o izmjenama i dopunama Izbornog zakona Bosne i Hercegovine, Centralna izborna komisija Bosne i Hercegovine je na prijedlog Gradske izborne komisije Mostar donijela zaključak broj: 05-1-02-2-660-5/20 od 24.07.2020.godine, kojim je za utvrđene izmjene u izbornim jedinicama u odnosu na ranije stanje, data saglasnost Agenciji za identifikacione dokumente, evidenciju i razmjenu podataka Bosne i Hercegovine (IDDEEA) da izvrši tehničke izmjene u aplikaciji „Pasivna registracija birača“.

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

Predsjednik vijeća  
Sudija  
Mirsada Džindo